

Otar gelo te ovel sluga ekhe manusheske, te parvarol balichen. Nanay, akana, so te hal i so dena e balichhen te han, ov da kavka hal.

Bre avdies – bre yavine, bre avdies – bre iavine; baya vakwti naklas. I ekh dives vakerel:

– Ka uhchav, ka zhav pash me dadeste! Lende isi but habe, pash les isi but piibe, ka zhav othe ka izvininav man leske, ta belkim ka prostinel mange, ta te ovav pash leste.

I ov da uhtinzhas ekh dives, lilas pes I reslas zhi ko gav kate beshel. O manusha sare dikhle, kay lesko chhavo irinel pes. Zhan, vakeren ko dat:

– Te zhanes, kay to hurdo chhavo avol.

Ov da san shudzhas, soske leskoro hurdo chhavo avol, lilas te loshanel i te vakerol pe slugenge:

– Shunen akana, mangav te chhinen nay-shukare guruves, nay-bare guruves, te keren shukar habe, te uraven les nay-shukar dimata, te thoven leske nay-shukar angrustik, soske kavka miro chhavo si ne nashaldo, akano o Dovol araklyas les mange, irinel les mange. Shundzhas me molitves o shukar Dovol.

Chhinde guruves leskire sluges, opravinde sichko, kerde, uravde les, thovde leske angrustik, dimata lache i pochninde te han, te pien.

Ya, ama leskoro baro pral sine buchate. Avol peske katar butu, so te dikhol – avri pherdi, pherdi manusha. Phuchhol e manushen:

– Abe, so achhilo pash me dadeste, ta borka manusha isi?

– Tu na zhanes li kay to hurdo phral irisalilo? – vakerena ola. – To dad chindzhas nay-bare guruvya, kerde nay-lache dimata, dinde leske nay-lachhe angrustik.

I ichka lile te han, te pien. Ama o baro chhavo sar irisalilo kere, leskoro dad diklas soske si otchaime, naskwrbime. Hulistilo pire odayate, lilas te tainel. Hulol leskoro dat pash leste, vakerol:

– A be, chedo tu soske ichka taines, na marmines? Soske tu ichka keres, sinan otchaime?

– Sar nanay te ovav otchaime, sar tu chuka keres! Me borka shunav tut, borka buti kerav, a mange nishto na keryan! Ekh bakre na chinan mange. A kavka, amaro chhavo, to hurdo, dikh so keras – lilas o love, halas, pilas i akana avol i chhindan leske nay-bare guruves. Sar nanay te skwrbina?

Pala leskoro dat vakerol leske:

– Ma holyane, chedo, kavka so dikhes, saro si tiro. Tu te loshanes, soske to phral sine nashaldo i o Dovol arakhlas les, andyas les pala pash amende.

I chuka ola zhivinde lachhipnasa.